



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻՆԱԶՆԱԺՈՂՈՎ

ՈՐՈՇՈՒՄ

17 հունիսի 2020 թվականի թիվ 67-Ս

ք. Երևան

«ԱՇՏԱՐԱԿ ԷԼԻՏ» ՍՊ ԸՆԿԵՐՈՒԹՅԱՆ ՆԿԱՏԱՍԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովը (այսուհետ՝ Հանձնաժողով) ուսումնասիրելով դիմումի հիման վրա 2020 թվականի հունիսի 01-ին հարուցված թիվ 5 վարչական վարույթի նյութերը՝ *պարզեց*.

«ԱՄԵԴԻԱ» ՍՊ և «ՎԻ ԷՄ ՏԵԼԵՊՐՈՉԵՔԹ» ՍՊ ընկերությունները (այսուհետ՝ Իրավատերեր) 2020 թվականի հունիսի 01-ին և 11-ին Հանձնաժողով մուտքագրված իրենց դիմումներում հայտնում են, որ հեռուստառադիոձրագրերի կաբելային (մալուխային) հեռարձակում իրականացնող «ԱՇՏԱՐԱԿ ԷԼԻՏ» ՍՊ ընկերության (այսուհետ՝ Ընկերություն) կողմից առանց պայմանագրային հիմունքների իրականացվում է հեռուստաձրագրերի վերահեռարձակում:

«ԱՄԵԴԻԱ» ՍՊ ընկերությունը իր դիմումում հայտնում է, որ առաջարկել է Հայաստանի Հանրապետության տարածքում հեռուստառադիոձրագրերի վերահեռարձակում իրականացնող ընկերություններին իր հետ կնքել հեռուստաալիքների վերահեռարձակման իրավունքի տրամադրման պայմանագիր: Ավելին, ըստ Իրավատիրոջ՝ Ընկերությունը իրազեկված լինելով օրենսդրական այն պահանջի մասին, որ առանց համապատասխան պայմանագրի իրավունք չունի իրականացնել հեռուստաալիքների վերահեռարձակում, սակայն Ընկերությունն առանց հեռուստաձրագրերի վերահեռարձակման իրավունքի տրամադրման պայմանագիր կնքելու շարունակում է «НТВ мир», «24 Техно» և «Hayka» հեռուստաալիքների վերահեռարձակումը:

«ՎԻ ԷՄ ՏԵԼԵՊՐՈՉԵՔԹ» ՍՊ ընկերությունն իր դիմումում նույնպես հայտնում է, որ առաջարկել է Հայաստանի Հանրապետության տարածքում հեռուստառադիոձրագրերի վերահեռարձակում իրականացնող ընկերություններին իր հետ կնքել հեռուստաալիքների վերահեռարձակման իրավունքի տրամադրման պայմանագիր, սակայն Ընկերությունն առանց հեռուստաձրագրերի վերահեռարձակման իրավունքի

տրամադրման պայմանագիր կնքելու շարունակում է մինչ օրս «PTP-ПЛАНЕТА», «РОССИЯ- КУЛЬТУРА», «РОССИЯ-24», «Discovery Channel», «Animal Planet», «Discovery Science», «DTX», «EUROSPORT 1», «EUROSPORT 2» հեռուստաալիքների վերահեռարձակումը:

Վերոնշյալ հեռուստաալիքների բացառիկ պաշտոնական ներկայացուցիչները Հայաստանի Հանրապետությունում վերապահված է Իրավատերերին:

Հանձնաժողովը ղեկավարվելով «Վարչարարության հիմունքների և վարչական վարույթի մասին» ՀՀ օրենքի 30-րդ հոդվածի 1-ին մասի ա) կետով և հիմք ընդունելով Իրավատերերի դիմումները՝ 2020 թվականի հունիսի 01-ին Ընկերության նկատմամբ հարուցել է վարչական վարույթ:

Հանձնաժողովը 2020 թվականի հունիսի 01-ին հարուցված վարչական վարույթի մասին ծանուցել է Ընկերությանը և հայտնել, որ այս հարցի վերաբերյալ կարող են ներկայացնել իրենց պարզաբանումները, բացատրությունները և իրավական հիմքերը:

Հարուցված վարչական վարույթի ընթացքում Ընկերությունը Հանձնաժողով գրավոր բացատրություն չի ներկայացրել:

Հանձնաժողովը ղեկավարվելով «Հեռուստատեսության և ռադիոյի մասին» ՀՀ օրենքի 36-րդ հոդվածի 1-ին մասի 18-րդ կետով և 45.1-րդ հոդվածի 1-ին մասով, համաձայն որի հեռուստառադիոընկերությունների գործունեության մշտադիտարկումն իրականացվում է ուղղակի դիտարկման, իսկ կաբելային (մալուխային) հեռուստառադիոհեռարձակման դեպքում նաև հեռուստառադիոընկերությունում տեղում դիտարկում իրականացնելու միջոցով և հիմք ընդունելով Հանձնաժողովի նախագահի 2020 թվականի հուլիսի 13-ի թիվ 24-Ս հրամանը՝ իրականացրել է Ընկերությունում մշտադիտարկում՝ տեղում դիտարկում իրականացնելու միջոցով, որի արդյունքում արձանագրվել է, որ Ընկերության կողմից չեն վերահեռարձակվում «НТВ мир», «24 Техно», «Наука», «PTP-ПЛАНЕТА», «РОССИЯ-КУЛЬТУРА», «РОССИЯ-24», «Discovery Channel», «Animal Planet», «Discovery Science», «DTX», «EUROSPORT 1» և «EUROSPORT 2» հեռուստաալիքները:

Հանձնաժողովի հիմնավորումները (պատճառաբանությունը) և եզրահանգումը.

Հանձնաժողովի կողմից ուսումնասիրվել է վարչական վարույթի մասնակիցների կողմից ներկայացրած փաստերը, որոնք համադրվել են մշտադիտարկման՝ Ընկերությունում ուղղակի դիտարկման արդյունքներին և «Հեռուստատեսության և ռադիոյի մասին» ՀՀ օրենքի խախտումն չի հայտնաբերվել:

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով Ընկերության նկատմամբ հարուցված թիվ 5 վարչական վարույթը ենթակա է կարճման:

«Հեռուստատեսության և ռադիոյի մասին» ՀՀ օրենքի 7-րդ հոդվածի 3-րդ մասի համաձայն՝ ոչ սեփական հեռուստառադիոհաղորդումները կարող են հեռարձակվել միայն դրանց հեռարձակման իրավունքը հավաստող փաստաթղթերի առկայության դեպքում:

«Հեռուստատեսության և ռադիոյի մասին» ՀՀ օրենքի 9-րդ հոդվածի 2-րդ մասի համաձայն՝ Հայաստանի Հանրապետությունում լիցենզավորված հեռուստառադիոընկերություններն օտարերկրյա հեռուստառադիոընկերությունների ծրագրերը կարող են վերահեռարձակել պայմանագրային հիմունքներով:

«Հեռուստատեսության և ռադիոյի մասին» ՀՀ օրենքի 52-րդ հոդվածի 1-ին մասի համաձայն՝ օրենքով սահմանված կարգով հեռուստառադիոհեռարձակում իրականացնող՝ Հայաստանի Հանրապետության տարածքում և նրա սահմաններից դուրս գործող ընկերությունների հեռուստառադիոծրագրերը հեռուստառադիոծրագրերի կաբելային (մալուխային) հեռարձակման լիցենզիա ստացած անձի կողմից կարող են վերահեռարձակվել միայն Հանձնաժողովի թույլտվության հիման վրա:

Թույլտվությունը տրվում է, կամ դիմումը մերժվում է վերահեռարձակում իրականացնելու համար Հանձնաժողովին դիմելուց հետո՝ 15-օրյա ժամկետում:

Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

1) վարչական իրավախախտման դեպքի կամ կազմի բացակայությունը:

Վարչական իրավախախտումների վերաբերյալ ՀՀ օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

2) գործի վարույթը կարճելու մասին:

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված՝ հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից և հիմք ընդունելով «Հեռուստատեսության և ռադիոյի մասին» ՀՀ օրենքի 7-րդ հոդվածի 3-րդ մասի, 9-րդ հոդվածի 2-րդ մասի, 52-րդ հոդվածի 1-ին մասի, Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները՝ Հեռուստատեսության և ռադիոյի հանձնաժողովը **որոշեց.**

1. Կարճել «ԱՇՏԱՐԱԿ ԷԼԻՏ» ՍՊ ընկերության նկատմամբ հարուցված թիվ 5 վարչական վարույթը:

2. Սույն որոշումն ուժի մեջ է մտնում այն վարչական վարույթի մասնակիցներին պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ

ՀԱՆՁՆԱԺՈՂՈՎԻ ՆԱԽԱԳԱՀԻ ՊԱՇՏՈՆԱԿԱՏԱՐՎ. ՕԶԱՆՅԱՆ

17 հուլիսի 2020թ.

ք. Երևան